

VENDIM
Nr. 100, datë 18.6.2024

**PËR DISA NDRYSHIME NË VENDIMIN NR. 95, DATË 9.5.2022, “PËR
MIRATIMIN E RREGULLORES, PËR VLERËSIMIN ETIK DHE PROFESIONAL TË
PROKURORËVE”, TË KËSHILLIT TË LARTË TË PROKURORISË, TË
NDRYSHUAR**

Bazuar në nenin 149/a, pika 1, germa “a”, të Kushtetutës; të nenet 159, 189, 190, pikat 3 dhe 4, të ligjit nr. 115/2016, “Për organet e qeverisjes së sistemit të drejtësisë”, të ndryshuar; të ligjit nr. 96/2016, “Për statusin e gjyqtarëve dhe të prokurorëve në Republikën e Shqipërisë”, të ndryshuar, si dhe me propozim të Grupit të Punës, Këshilli i Lartë i Prokurorisë,

VENDOSI:

1. Miratimin e disa ndryshimeve në rregulloren “Për vlerësimin etik dhe profesional të prokurorëve”, të miratuar me vendimin nr. 95, datë 9.5.2022, sipas tekstit bashkëlidhur këtij vendimi.
2. Ky vendim hyn në fuqi në datën e botimit në Fletoren Zyrtare dhe publikohet në faqen zyrtare *web* të Këshillit.
3. U shpall në Tiranë, sot, më 18.6.2024.

KRYETAR
Mirela Bogdani

**PËR DISA NDRYSHIME NË RREGULLOREN¹
“PËR VLERËSIMIN ETIK DHE PROFESIONAL TË PROKURORËVE”**

Neni 1

Në nenin 32, në paragrafin 3 pas fjalëve “në mënyrë të detajuar dhe të strukturuar” shtohen fjalët “*problematikat dhe gjetjet sipas të dhënave ...*”.

Neni 2

Në aneksin nr. 1², pika 10, pas fjalisë së parë shtohet fjalia e dytë “*Pikëzimi i çdo treguesi kryhet sipas rendit zbritës, duke filluar nga pikëzimi maksimal dhe caktohet në bazë të arsyetimit mbi problematikat dhe gjetjet, të konstatuara në treguesit përkatës, që rezultojnë nga shqyrtimi i burimeve të vlerësimit*”.

Neni 3

Në aneksin nr. 7³, pika 10, pas fjalisë së parë shtohet fjalia e dytë “*Pikëzimi i çdo treguesi kryhet sipas rendit zbritës, duke filluar nga pikëzimi maksimal dhe caktohet në bazë të arsyetimit mbi problematikat dhe gjetjet, të konstatuara në treguesit përkatës, që rezultojnë nga shqyrtimi i burimeve të vlerësimit*”.

¹ Miratuar nga Këshilli i Lartë i Prokurorisë me vendimin nr. 95, datë 9.5.2022.

² Metodologjia për prokurorët e shkallëve të para.

³ Metodologjia për prokurorët e Apelit.

Neni 4

Në nenin 41, pas paragrafit 2 shtohet paragrafët 3 dhe 4 më këtë përmbajtje:

“3. Pikëzimi për aspektin “Aftësia për të përballuar ngarkesën në punë” të aneksit nr. 1, të rregullores së vlerësimit dhe treguesit “Aftësia për të kryer procedurat gjyqësore” të aneksit nr. 7, të rregullores së vlerësimit, për periudhat e vlerësimit 3-vjeçar që përfshihen të plota në periudhën e vlerësimit për vitet 2017–2021 dhe të vlerësimit 5-vjeçar 2017–2021, do të prezumohet të jetë në nivelin maksimal të parashikuar në metodologjitë përkatëse, duke u vlerësuar përkatësisht 50 pikë dhe 30 pikë.

4. Rekuizitat në tabelat e aneksit 2 dhe aneksit 8, të rregullores së vlerësimit për periudhat e vlerësimit të përcaktuara në pikën 4 të kësaj dispozite, do të thjeshtohen për aq sa është e mundur, si edhe me metodën teknike ose elektronike të përpunuar nga zyrat kompetente të Këshilli.”

Neni 5

1. Aneksi nr. 1 “Metodologjia”, në kriterin IV “Aftësia personale dhe angazhimi profesional”, nënkriteri “C”, “Gatishmëria e prokurorit për t’u angazhuar në veprimtari të tjera”, ndryshohet për treguesit si vijon:

a) Tabela e pikëzimit për kriterin IV, nënkriteri “c”, treguesi “a”, që lidhet me pjesëmarrjen e prokurorit në programet e formimit vazhdues të Shkollës së Magjistraturës dhe në trajnime të tjera profesionale (20 pikë), ndryshohet si më poshtë:

Pjesëmarrja e prokurorit Periudha 3-vjeçare	Nr. i pikëve	Pjesëmarrja e prokurorit Periudha 5-vjeçare	Nr. i pikëve
< = 5 ditë	5 pikë	< = 5 ditë	5 pikë
6–15 ditë	1.5 pikë për çdo ditë	6–30 ditë	0.6 pikë për çdo ditë
> 120 ditë	zbritet 1.5 pikë për çdo ditë	> 200 ditë	zbritet 0.6 pikë për çdo ditë

b) Paragrafi i tretë i kriterit IV, nënkriteri C, i treguesit “b”, që lidhet me disponueshmërinë e prokurorit për të udhëhequr kandidatët për prokurorë gjatë stazhit profesional dhe/ose për trajnimin e prokurorëve (5 pikë), ndryshon si më poshtë:

Duke marrë parasysh se pjesëmarrja në veprimtari të tilla nuk është gjithmonë në varësi të vullnetit të prokurorit, të gjithë prokurorët për këtë tregues vlerësohen me 5 pikë.

Prokurorët që nuk caktohen nga Këshilli si prokuror udhëheqës në praktikën profesionale të kandidatëve për prokurorë, për shkak se nuk plotësojnë kushtet ligjore të parashikuara në ligjin nr. 96, “Për statusin e gjyqtarëve dhe prokurorëve”, neni 33 pika 3, gjerat “b”, “c”, “ç”, “d”, për këtë tregues vlerësohen me zero pikë.

Prokurorët që kryejnë këtë veprimtari njëkohësisht me veprimtarinë betimore, pavarësisht nga frekuenca e angazhimit, marrin bonus 2 ditë në përllogaritjen e ditëve në formimin trajnues.

c) Paragrafi i tretë, i kriterit IV, nënkriteri C, i treguesit “c”, që lidhet me pjesëmarrjen e prokurorit në veprimtari ndërinstitucionale për përmirësimin e sistemit të drejtësisë dhe në veprimtaritë për marrëdhëniet me publikun (5 pikë), ndryshon si më poshtë:

Duke marrë parasysh se pjesëmarrja në veprimtari të tilla nuk është gjithmonë në varësi të vullnetit të prokurorit, të gjithë prokurorët për këtë tregues vlerësohen me 5 pikë.

Prokurorët që janë caktuar për të marrë pjesë në veprimtari të tilla dhe pa pengesa, dhe shkaqe të natyrës objektive nuk marrin pjesë, për këtë tregues vlerësohen me zero pikë.

Prokurorët që marrin pjesë në veprimtari të tilla njëkohësisht me veprimtarinë betimore, pavarësisht nga frekuenca e angazhimit, marrin bonus 2 ditë në përlllogaritjen e ditëve në formimin trajnues.